



**REPUBLIKA E SHQIPËRISË  
KOMISIONI QENDROR I ZGJEDHJEVE**

**Komisioni i Ankimimeve dhe Sanksioneve**

Data: 12.05.2023

Nr: 104

Ora: 14:00

**VENDIM**

**PËR SHQYRTIMIN E KËRKESËS NR. 26, DATË 10.05.2023 TË KOMISIONERIT SHTETËROR TË  
ZGJEDHJEVE**

Komisioni i Ankimimeve dhe Sanksioneve në mbledhjen e datës 12.05.2023, me pjesëmarrjen e:

|                |                |   |                |
|----------------|----------------|---|----------------|
| <b>Elvis</b>   | <b>ÇEFA</b>    | - | <b>Relator</b> |
| <b>Elvin</b>   | <b>LAKO</b>    | - | <b>Anëtar</b>  |
| <b>Ilirjan</b> | <b>RUSMALI</b> | - | <b>Anëtar</b>  |
| <b>Koli</b>    | <b>BELE</b>    | - | <b>Anëtar</b>  |
| <b>Ledio</b>   | <b>BRAHO</b>   | - | <b>Anëtar</b>  |

Shqyrtoi çështjen me:

**KËRKUES:** Komisioneri Shtetëror i Zgjedhjeve

**OBJEKT:** Kërkesë për vendosje sanksioni administrativ, gjobë në masën 5 000 (pesë mijë) lekë ndaj z. Arben Qafa, drejtor i Qendrës Kulturore “Margarita Tutulani”, Berat.



**BAZË LIGJORE:** Neni 19, pika 1, shkronja “c” dhe neni 21, pika 1, shkronja “dh” të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar.

#### **Rrethanat e çështjes:**

1. Në Komisionin Qendror të Zgjedhjeve, Z. Ivi Kaso ka depozituar denoncimin regjistruar me numër regjistri 379 ID, datë 03.05.2023, për të cilin pretendohet se ka patur përdorim të burimeve publike për qëllime zgjedhore, duke shkelur parashikimet e nenit 91 të Kodit Zgjedhor dhe vendimit nr.9, datë 24.12.2020 të Komisionit Rregullator. Denoncuesi shpreh se në faqen zyrtare “Facebook” të Qendrës Kulturore “Margarita Tutulani” janë postuar aktivitete propagandistike dhe elektorale, në mbështetje të kryetarit aktual të bashkisë Berat z. Ervin Demo.
2. Mbi këtë bazë, Komisioneri ka nisur hetimin administrativ ndaj z. Arben Qafa, drejtor i Qendrës Kulturore “Margarita Tutulani”, Berat. Në mbështetje të provave dhe fakteve, rezultoi se rasti objekt denoncimi përbën shkelje administrative të nenit 91 të Kodit Zgjedhor, pasi ka vënë në dispozicion faqen zyrtare “facebook” të institucionit publik që drejton, për të publikuar postime të karakterit elektor/politik, duke promovuar kështu subjektin zgjedhor “Partia Socialiste e Shqipërisë” për zgjedhjet vendore të datës 14 Maj 2023.
3. Me anë të vendimit nr. 471, datë 09.05.2023, Komisioneri Shtetëror i Zgjedhjeve ka urdhëruar fshirjen e menjëhershme të postimit me përmbajtje elektorale nga faqja zyrtare e rrjetit social “Facebook” të institucionit publik.
4. Komisioneri ka vënë në lëvizje KAS-in me anë të një kërkesë, duke kërkuar marrjen e masës administrative me gjobë ndaj z. Arben Qafa, drejtor i Qendrës Kulturore “Margarita Tutulani”, Berat në masën 5 000 (pesë mijë) lekë, sikurse parashikohet nga dispozita e nenit 171 pika 1 e Kodit Zgjedhor.
5. KAS-i caktoi me short z. Elvis Çefa relator për shqyrtimin e kërkesës nr. 26, datë 10.05.2023 të Komisionerit Shtetëror të Zgjedhjeve dhe në seancën paraprake vendosi pranimin për shqyrtim të kërkesës, duke e caktuar seancën e shqyrtimit më datë 12.05.2023, ora 14:00.

6. Seanca e datës 12.05.2023 u zhvillua me praninë e Sekretarit të Përgjithshëm të KQZ-së, si përfaqësues i Komisionerit Shtetëror të Zgjedhjeve dhe të specialistëve të administratës së KQZ-së. Z. Arben Qafa, i njoftuar rregullisht nuk u paraqit në seancën e shqyrtimit.

7. KAS-i mori në shqyrtim dhe administroi:

- Kërkesën nr. 26, datë 10.05.2023 të Komisionerit;
- Vendimin nr. 471, datë 09.05.2023 “Për shqyrtimin administrativ të denoncimit nr. 379 ID, të z. Ivi Kaso ndaj drejtorit të Qendrës Kulturore “Margarita Tutulani”, për shkelje administrative, për zgjedhjet për organet e qeverisjes vendore të datës 14 Maj 2023”;
- Denoncimin nr. 379 ID të z. Ivi Kaso, bashkëlidhur prova materiale fotografike.

Në përfundim të shqyrtimit administrativ dhe të vlerësimit të provave dhe pretendimeve përfundimtare,

#### **KAS-i konstaton:**

1. Kërkesa e Komisionerit për vendosjen e sanksionit administrativ ndaj z. Arben Qafa, drejtor i Qendrës Kulturore “Margarita Tutulani” bazuar në denoncimin me nr. 379 ID të z. Ivi Kaso, ka lidhje me postimin në faqen zyrtare të “facebook” të Qendrës Kulturore “Margarita Tutulani” në favor të kryetarit dhe njëkohësisht kandidat për kryetar bashkië të subjektit zgjedhor “Partia Socialiste”, z. Ervin Demo. Prova në materialin fotografik qartëson se postimi mban datën 03.05.2023, d.m.th. është kryer gjatë periudhës së fushatës zgjedhore.
2. Faqet zyrtare të institucioneve publike në rrjetet e ndryshme sociale (Facebook, Twitter, Instagram etj.) bëjnë pjesë në kategorinë “asete”, në kuptim të pikës 2 të nenit 91 të Kodit Zgjedhor, që do të thotë se janë burime të institucionit sipas kësaj dispozite. Kjo do të thotë se faqja zyrtare e “Facebook” e Qendrës Kulturore Berat, **nuk mund të përdoret ose të vihet në mbështetje të kandidatëve, të partive politike ose të koalicioneve në ZGJEDHJE.**
3. Pika 1, e nenit 91, të Kodit Zgjedhor përcakton se *“...nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje burime të organeve*

apo enteve publike në nivel qendror ose vendor, apo çdo lloj enti tjetër ku shtetizotëron kapitale apo kuota ose/dhe emëron shumicën e organit mbikëqyrës apo organit administrues të entit, pavarësisht nga burimi i kapitalit ose pronësia”. Kjo dispozitë është përsëritur në mënyrë të ngjashme edhe nga vendimi i Rregullatorit nr. 9, datë 24.12.2020 në përkufizimin e “veprimtarive të ndaluara” kur ndalon “vënien në dispozicion të asetëve të luajtshme dhe të paluajtshme ... për qëllime zgjedhore”.

4. Pika 1 e nenit 171 të Kodit Zgjedhor përcakton sanksionin për shkeljet e kryera “nga anëtarët e komisioneve të zgjedhjeve ose nga **persona të ngarkuar me detyra, sipas këtij Kodi**”. Personat e ngarkuar me detyra formojnë një listë personash/institucionesh të cilët janë ngarkuar me detyra nominalisht nga Kodi Zgjedhor. Të tillë janë p.sh. vëzhguesit a përfaqësuesit e subjekteve zgjedhore në KQZ (për etikën e punës e të komunikimit), Drejtoria e Përgjithshme e Gjendjes Civile (për dërgimin e të dhënave nga regjistri për ndarjen e zonave të administrimit zgjedhor, për listën e zgjedhësve etj), zyra e gjendjes civile dhe kryetari i bashkisë (për listën e zgjedhësve), kryetari i bashkisë (për caktimi e qendrave të votimit), Ministri që ka në varësi shërbimin e gjendjes civile (për nxjerrjen e urdhrave për listat dhe zonat e qendrave të votimit) etj.. Fakti se ata dhe detyrat e tyre përcaktohen nga Kodi do të thotë se lista e tyre është e fundme dhe nuk mund të shtohet me ndonjë akt tjetër ligjor ose nënligjor. **Titullari i institucionit apo entit që ka në administrim asetin publik nuk bën pjesë në listën e “personave të ngarkuar me detyra, sipas Kodit”.** Në këto kushte, sanksioni ndaj tij nuk mund të vendoset sipas pikës 1, të nenit 171, të kodit zgjedhor. Në këtë rast, dispozita e aplikueshme për sanksionim mbetet ajo e pikës 2 të nenit 171.
5. Bazuar në këtë analizë të fakteve dhe të kuadrit ligjor, KAS-i çmon se ndaj z. Arben Qafa, drejtor i Qendrës Kulturore “Margarita Tutulani”, Berat duhet të merret masë administrative, sipas pikës 2 të nenit 171 të Kodit Zgjedhor.

#### PËR KËTO ARSYE:

Bazuar në nenin 21, pika 1, shkronja ‘dh’, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, Komisioni i Ankimimeve dhe Sanksioneve

## V E N D O S I:

1. Pranimin e pjesshëm të kërkesës nr. 26, datë 10.05.2023 të Komisionerit Shtetëror të Zgjedhjeve për vendosjen e sanksionit administrativ.
2. Vendosjen e sanksionit administrativ gjobë në masën 2 500 (dymijë e pesëqind) lekë ndaj z. Arben Qafa, drejtor i Qendrës Kulturore “Margarita Tutulani”, Berat, bazuar në nenin 171, pika 2, të ligjit 10019, datë 29.12.2008 “Kodi Zgjedhor i Republikës së Shqipërisë, i ndryshuar”.
3. Ngarkohet administrata e KQZ-së me njoftimin e këtij vendimi palëve në mungesë dhe me zbatimin e tij.

Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.

Bazuar në pikën 1 të nenit 18 të ligjit nr. 49/2012 “Për gjykatat administrative dhe gjykimin e mosmarrëveshjeve administrative“, të ndryshuar” mund të bëhet ankim në Gjykatën Administrative të Shkallës së Parë Tiranë, brenda 45 ditëve nga njoftimi i këtij vendimi.

U shpall sot më datë 12.05.2023.

|                |                |   |                |
|----------------|----------------|---|----------------|
| <b>Elvis</b>   | <b>ÇEFA</b>    | - | <b>Relator</b> |
| <b>Elvin</b>   | <b>LAKO</b>    | - | <b>Anëtar</b>  |
| <b>Ilirjan</b> | <b>RUSMALI</b> | - | <b>Anëtar</b>  |
| <b>Koli</b>    | <b>BELE</b>    | - | <b>Anëtar</b>  |
| <b>Ledio</b>   | <b>BRAHO</b>   | - | <b>Anëtar</b>  |